



in felicitatis suae fastigio constituta, Reges exemplo Salomonis, ^{a)} unctos fuisse perhibent ad fontem Gichonem, siue fontem in monte Gichone, qui ex parte urbis Hierosolymorum occidentali haud procul a monte caluariae situs fuit, et e quo Hiskias ^{b)} praecipuum urbis aquae ductum, maximo sumtu, sed eximio urbis commodo, perfecit. Modum, quo oleum sacrum in fronte Regis fuit diductum, singularissimum quidem, sed regiae dignitati conuenientissimum exponunt, quem traditioni haud contemnendae acceptum ferunt. Oleum scilicet digito ungentis in forma coronae fronti regis illitum fuisse perhibent, interprete MAIMONIDE: מלכי בית דוד מושחין אותם כמין נזר על ראשו לא ימשה במקומות אחרות ולא ירבה בשמן. *Reges domus Dauidicae unguunt per modum coronae in capite, non unguunt aliis locis, nec multum consumunt olei.* Figuram aeri eleganter incisam exhibet FORTVNATVS SCACCHVS ^{d)} in *sacris Eleocharmatibus.*

VII

PONTIFEX M. VNCTVS EST VESTIBVS AVREIS INDVTVS,
CIDARIQVE PONTIFICALI ORNATVS.

LEVIOR haec uideri poterat obseruatio, quam ut digna iudicari queat et examine et demonstratione. At enim uero aliquid causae subest, cur hanc sententiam, ut intactam relinqueremus, a nobis impetrare haud potuimus. Vt enim taceamus, ordinem uerborum in sacro textu, qui exponit de Pontificis unctio, id, ut credamus, praecipere, cum unctio Pontificis non nisi exposita de uestibus induendis cidarique imponenda historia ^{a)}

praeci-

a) 1. Reg. I, 33. 34.

b) 2. Paralipomen. XXXII, 30.

c) de Vasis Sanctuarii Cap. I. §. IX.

d) Myrothecio II. Cap. LXXIX. p. 717.

confer uberius hac de re differen-

tem GVIL. SCHICKARDVM in iure regio Hebraeorum Cap. I. Theorem. IV. p. 71. sequ.

a) Exod. XXIX, 6. 7. 29. Leuit. VIII, 12.